

## 2 Tesalonaika

<sup>1</sup> Antarko wuyelikeknel, apm Pol antempel Sailas nti Timoti, ant apul wupm epieel nakimp yipm mentitmaken Wulapm Weinkel pe ar yemp suknel Tesalonaikael, yipm ka ar nta Waiek Keipmel antilel antempel Sepmel antilel Jisas Krais. <sup>2</sup> Ant ka aiyimp Wulapm Weink nako kil yeyupulp yipm i ko kil yumuk yipm yapmunemp niuluknuel.

*Pol Nak Tukuaremp Wulapm Weink Apulp Wunamp Sepmel Antuel Nti Tesalonaikael*

<sup>3</sup> Aninkanink ant nak naremp Wulapm Weink nkirkerip apulp yipmel, apulpaser yapmunemp aiyipmel ka ar mintenk antempil, ka sankork yapmunemp mintenkel aiyipmel kareparepelel. I yipm akeiwanto ka mpuaimpuai na yupulp yipm aiyipm yapmunemp sepmel aninkaninkel. Wunamp sepmel epe yipm nkisel karep kakir mpim'uriekn pe ant ka nak tukuaremp Wulapm Weink apulp yipm. <sup>4</sup> Wankepm irpm ka ninkem yipmel pe yakop yipm eipmel ka nti moule mpurel ak yipm apulpaser nti nkarkemp yayapel Jisasel ka yipm nakerpmel, aser yipm karokn nkark. Yipm ka ar nkis niumumpuel arkos wankepm epe nti ak yipmel Ant ka natip yipm yatip apulp wunamp aiyipmel epie. Pe ant mpi wampwampel sukueimp nti mentitmaken Wulapm Weinkel apulp wunamp sepmel aiyipmel epe i ant aiki nia aiyipmel namp keipm.

*Wulapm Weink Ka Akei Yapmunemp Sepmel Antunaiye Ant.*

<sup>5</sup> Wankepm ka yipm ninkemel ka apul niokn ar yapmunemp aiyipmel pminel, nimpilemp yipm ar pminel. Wulapm Weink ka ser wunamp aiyipmel ka yipm nkisel i kil arai yiki nia aiyipmel niek na, “Yipm ako ka elmpsoip. Yipm arai war yer nta apmillel i ko yintemp apm yupul niokn. Ntakilelel, nti wampwamp ko ser aipopel Wulapm Weink ka sop yapmunemp sepmel suwaink, pe kona kil yuntunel ant mouleel ka wat a ntunk.

<sup>6</sup> Kil ko yupul ntalekil. Jisas antemp nti ensel niawurpmel ankilel arai yo yentemp yiteliengk ka mirmirelel. Anink ekilelel, nti moule ka ak yipm yakop apulpaser nti ka nkarkemp yayapel Jisasel ka yipm nakerpmel, nti epe, Wulapm Weink arai yupul nti milminel waperel. <sup>7</sup> Pe kil ko yikei mintenk ankilel yuntun wankepm aiyipmel epe, i kil ko yupul moule aiyipmel pmin'urienk ko ampu yer pipilaknim. <sup>8</sup> Nti moule yapmunemp antuel karokn akorp apulp Wulapm Weink mi nti yimpil pmomp ar kilel, sank sepmel apulp Jisasel ka nti eipmel, nti karokn apul sop. <sup>9</sup> Eti Wulapm Weink arai yupul nti kuret waperel ntalekil. Kil oko yo yikei lomp yuntun nti, pe nti kako yipei peik. Nti kapukorokn war yer kitnan nantipil, nti kapukorokn ser niawurpm suknel ankilel ka ntaka yiteliengk sepmel ka le yemp ka ntinkirienel. Pe ntakelelel nti kapuko eipm yakop yupmueiel.

<sup>10</sup> Ekilelel kona Jisas yoeelel, nti mentitmaken Wulapm Weinkel, ka yapmunemp mintenk apulpilel, nti ko yiki nia ankilel no keipm, pe mpuaimpuai antuel yupulpilel kapuko suknelip.

Aser kapukorokn nti likekn, ka yipm ankil oko yintemp ntiel yikei mpuaimpuaiel yupulpilel. Apulpaser sank Wulapm Weinkel ampueik ant nakimp yipmel, yapmunemp aiyipmel ka mintenk ampulp.

*Nti Aiyimp Wulapm Weink Ko Kil Yek Nti Tesalonaika Mintenk Ankilel*

<sup>11</sup> Wulapm Weink ampueik aiyimp kuap yipm na yer ntaka ntitmaken ankilelel, i kapepe ant aiyimpil ko kil yupulp yipm na yupul sop sankwunamp ankilel sukurel. Niokn sepmel simi yipm puikn na yupulel ko ant yimpil na yupulp yipm nako yipm yupulel. Kil kona yiki yipm yapmunemp yupulp niokn simisimi ankilelel, ant ka aiyimpil na rukopm sepmel arai niker niokn epeel. <sup>12</sup> Eti yipm arai yuntun nia sepmel yek Jisas Kraiss, Sepmel Antilel, nako kil yuntun nia sepmel yimp yipmel. Apulpaser kil antempel Wulapm Weink ka aiyeapulp yipm.

## 2

*Moule Ka Antemp Wulapm Weink Nkisemp Wuroknel Arai Ninink*

<sup>1</sup> Ekeielel ant'a nikimp yipm sank yupulp nako arai Sepmel antilel Jisas Kraiss ampu yo i ko antarko niyeniye yintempil yer likeknel. Ant nakimp yipm na <sup>2</sup> yapmunemp aiyipmel kakorokn nimpilemp mpilyilmpilyelel yupulp sank irpm yipm eipmel ka nti nak na awun ka Jisas ampu na yoel ka niminink. Karokn. Kona mewel somp sank ekeielel yer yempel i kil niek silep yupulp, mi kona mewel niek na,

“Ka Pirpm Wulapm Weinkel ankil akei niepm apmilel nak aworp sank epie, ka yapmunemp Wulapm Weinkelel”. Kona nti niek ntakilelel, ka yipm'orokn numpul yupulp. Mi rokn, kona mewel niek sank ntakilelel mi apul wupm nek na wupm epie ka ant moule Polel ankil apulel, ka kil ninkai yipmel. Yipm ko yer nkis niumpuel pe yipm'orokn somp yapmunemp wankepmel yupulp.

<sup>3-12</sup> Ka yipm korokn somp sank mpulmpul simisimi ka mewel nakimp yipmel na pokel yum yo yapmunemp ntaka sank ka likeknelel. Yipm eipm. Awun ka Jisas na yoel kapukorokn ninink kuserel. Karokn. Sukur kako nti moule mitinkel arai yikei yupul mipmaip warpmel niek nkiyir Wulapm Weink, pe nti kako yupul puikn antuel. Niatel i, mouleel ka antemp Wulapm Weink nkisemp wuroknel, kil ko yipmot yemp yapelel. Pe ekeielel, setel ka ntunkorp yayapel ankilel. Pe yapmunemp epe apulp na yintemp Wulapm Weink nkisemp wuroknel ka pe apul niokn ar nkuwepm, ka yipm karokn aser akorp yapmunemp ntakeielel ka apul nioknel mi. Pe yapmunemp epe oko yer nkuwepm mpimpi ser Wulapm Weink ko niek na nkiyir simi ka tunkorp yayapel moule kureteli epeel ka antempil nkisemp wuroknel. Kona Wulapm Weink niek na kil na nininkel, i ko kil ninink yapelelim.

Niatel Satan oko yek kil mintenk i ko kil wanankilelel nti mouleel. Kil ko yikei mintenk Satanel yumpul niokn mintenkel ninkaiielel i ko nti serk yikei tninelel. Moule epe kana somp yemp Wulapm Weinkel na yer niorknel ko nti yikei-

wanto yepil suwaink yer yitne suknel Wulapm Weinkel, i kil ko niek na, “Apm ankil ka Wulapm Weink.” Eti moule epe ko niek yuntup nti mentitmaken kana sop yayapel Wulapm Weinkelel, nti kapukorokn yiki nia Wulapm Weinkel yikei kil nkael. I kil ko niek yuntup nti mentitmaken yatyatel, nti kapukorokn yikei niawurpm kitapmel ntaka walaipm linkepm irpm. Kil kana yupul niokn simisimi kuretel ntalepe yupulp na kil ninkaiel kuap nti ntitmaken na sopilel.

Ampueikel ka Wulapm Weink nakimp nti ntitmaken epe sank likeknel apulp Jisas nako kil nantip mua yirkomp ntiel, aser nti ka nkark. Nti karokn apulp na eipmil sank yum yer yapmunemp. Nti na yupul puikn antuel na yupul sankwunamp'uretel irpm, pe nti na sop moule epe ka antemp Wulapm Weink nkisemp wuroknel. I kapepe Wulapm Weink kako yupul nti yapmunemp kapuko mpurampuraelim i nti arai misop sank ninkaiel. Nti kapuko wunempwaiyimp na sank epe ka likeknelim.

Ntakilelel nti karokn mpuaimpuai apulp sank ka Wulapm Weink nak mi ka wat a ntunkel. Nti ka mpuaimpuai apulp wunamp'uretel. Pe kona Wulapm Weink na yuntunel ant mouleel, arai kil yek nti wankepm suknel yupul nti milminel i, nti kako yawopmelim.

Moule kuretel epe ka antemp Wulapm Weink nkisemp wuroknel, kil kako yer yupul niokn kuretel ankilel, aser aninkel Jisas oko yo yimintempel yitemilaikn suknel ankilel ko milipmilaiknel yumulpil nako yupul moule epe milminel. I ko

Jisas yikei wolpm niawurpmel ankilel yek niepm ankilel sompil i ko Jisas yer kil wuntuim.

*Wulapm Weink Ka Yuwak Yipm Ampulp Na Yipm Na War Yer Nta Ankilelel*

<sup>13-14</sup> Yipmarko mamuntomp antilel nti, ant ka nak naremp Wulapm Weink ntentenk apulp yipm. Apulpaser ampueik yek nimpiliekn lael, Wulapm Weink ankil ka yuwak yipm. Pirpm Sepmel ankilel ka apul niokn apmuei yipm yapmunemp pmiempniumpuaipm aiyipmel nako kil ye yipm mper yatelel i yipm ko ankilelim. Sank sepmel Wulapm Weinkel ampueik ant nakimp yipmel, ka yipm nkamp sank epe aim ar yapmunemp aiyipmel. I yipm nak na sank epie ka Wulapm Weink nakel ka likeknelim i yapmunemp aiyipmel ka ar mintenk ampulp. Ntape eti, kil ka nantip mua arnkomp yipm i yipm ka ar mintaka ntitmaken ankilelel. Pe ant ka aser amorel puikn ankilel, kil ka apulp yipm yatip, eti karep kil aiyimp yipm na yipm'a yintemp Sepmel Antilel Jisas yerel. Nia sepmel kana sompilel, yintempel niawurpm suknel ankilel ka ntaka yite akosepmel ka milipmilaiknelel ko yuwulmp Jisas yipmarko soplikekn. Kapepe akosepmel aninkanink ant ka nak tukuarempil ampulp yipm. <sup>15</sup> Wupm irpm ant apulp yipmel antempel sank ka ant nakimp yuwap yipmel, ko yer nimimpiepm yer yapmunemp aiyipmel nako yipm yer nkis niumumpuelel.

<sup>16</sup> Sepmel Antilel Jisas Kraiss antempel Waiek antilel Wulapm Weink ka apulp ant yatip, ka akei yapmunemp sepmel aiyeapulp antel. Ntiwie ka

mintenkitneip ant apulp yapmunemp antilel ko yer mintenk pe ant ka niampepm tanku tneip ntiwuye ko yupulp ant sepmel yupmuei yupmueiel. <sup>17</sup> Kapepe ant aiyimp ntiwie na mintenkitneip yipm yapmunemp nako aninkanink yipm yer nkis sankwunamp sepmel suwainkelel.

### 3

#### *Yipm Yimp Wulapm Weink Yupulp Nako Kil Yikiwat Yipmel*

<sup>1</sup> Eti yipm ampu eipm sankel epie apm'a nikimp yipmel. Yipm niek sank yimp Sepmel antilel na kil ko mintenkitneip ant eti sank ankilel ko sikir yikei yetel mpi wampwampel. Pe nti kako eipm sank ankilelel nako nti yep sank epie ntaka si suknel nuarep ampueik yipm apulel. <sup>2</sup> Yipm ka ntinkirai, nti moule kuretel ka aim yapmunemp ntupmuel nak sank wael apulp sank Wulapm Weinkelel. I kapepe ant aiyimp yipm nako yipm markipninket Jisas nako kil yikei nta lep ant yupulp nti pe nti kapukorokn yupul ant kuret. <sup>3</sup> Aser Sepmel antilel ka akolikekn yatip i kil kako yupul sop sank nuwarel sukurel ka kil nakel. I kapepe yipm kapuko yikei kil nkael nako kil mintenkitneip yipm yapmunemp niumuayikei yipm yupulp na Satan kapukorokn yupul yipm milminel. <sup>4</sup> Sepmel Antilel ka aiki ant yapmunemp ka ar mintenk apulp sankwunamp ka yipm nkisel. Sank niawurpmel sukurel ant nakimp yipmel, karep yipm apul misop, eti araiaraiel kapuko yipm yupul soplikekn. <sup>5</sup> Eti ant markipninket Sepmel Antilel ko kil yikei su lep yipm yapmunemp nako yipm ser

yuworel Wulapm Weink ka kil akei ntaniupuknel ankilel nkrawomp yipmel i ko yipm ser yuworel wunamp Kraisel ka kil ar nkis niunumpuel mi kil arkos wankepmel. Ntakilelel yipm kapuko nkis wunamp sepmel soplikekn.

*Nti Moule Wantosukurel Ko Yikei Nta Antuel Yupul Nioknelmp*

<sup>6</sup> Ant nkamp mpunti Jisas Kraisel, ka Sepmel Antilel, nako ant nikimp yipm sank niawurp-mel likekn. Nti mamuntomp aiyipmel minititep ka yuwa likipel apulp niokn antuelel, ka yipm ntanisep nti yer antuel yatel. Nti karokn apul sop sank ant ka nakimp yuwap yipmel. <sup>7</sup> Ant antemp yipm arel, sankwunamp antilel ka ntaka muati kana ntiremp yipm yayapel nako yipm nikerpmel. Pe ant arokn akei likipel apulp niokn mpuampua. Karokn. <sup>8</sup> Ant ka ntinkiliemp apul niokn nomp awun apulp nako ant somp wun-tokn mi ko yuwulmp ant ankil yupulp niepm irpm mpuampuael. Ant 'arokn apulp na yipm kana yirkos wankepm yupulp na yuwulmp antel. <sup>9</sup> Mpunti ka sil antel ko ant nikimp yipm na yuwulmp antel. Aser puikn antilel, ant'a yikei sankwunamp antilel kako ntiremp yuwap yipm ntaka muatiel, nako yipm serel i ko yipm yupul misoplikekn. <sup>10</sup> Ant antemp yipm arel, ant ka nakimp yipm sank niawurp-mel likekn, nak na kona mewel karokn na yupul nioknel eti ka kil yer nilmpel, pe ka yipm'orokn yuwa kil niepm yel.

<sup>11</sup> Aser ant eipm sank na nti moule mpurel aiyip-mel ka ar kuserel, nti karokn apul niokn. Sankwu-namp antuel ka nti ar nkisel, nti karokn nta wat



a pmin, nti ka nkis akei apulapulel. <sup>12</sup> Sepmel Antilel Jisas Kraiss ka ak ant niwaurpm ankilel pe ant nakimp nti epe mpunkolel nak na, “Yipm nkis yitonk ntemp yo kitapm yupul nioknelmp irpm aiyipmel, nako yipm yikei niepm aiyipmel niumuapm yuwa yipmel!”

<sup>13</sup> Mamuntomp antilel nti, yipm'orokn sirkemp sankwunamp sepmel, kako yipm yupul. <sup>14</sup> Kona mewel korokn yupul sop sank pie ant apul sil wupm ekeielel, eti kako yipm niuknu yuwapil aipopel. Pe yipm'orokn yintempil yer nkis, nako kil wulemaiya kn yupulp wunamp ankilel epe ka kil ar nkisel. <sup>15</sup> Ant arokn nak nako nkiyir kil nuarep moule wuroknel. Karokn. Ka yipm yikei niumuai pmel yuworkwunempil sankintempil. Kil ka mamuntomp aiyipmel.

*Pol Nakimp Nti Sank Knuael.*

<sup>16</sup> Ant aiyimp Sepmel Antilel ko kil yintemp yipm yikeiwanto yer, nako yek yipm yapmunemp niulukn unel. Kona ntakilelel, moule aiyipmel pmin'uriekn oko yer niumuai pm piriepmel, apul-paser kil ka weink apulp yapmunemp niulukn unel. <sup>17</sup> Apm Pol, apm sankar yipm, awun sepm. Apm ankil akei nta apm ilel apul sank akopiteknel apm ilel epie. Wupm wanto apm ilel kona yipm serel, ka yitomprai ntakilelel silel, ka apm ilel. <sup>18</sup> Sepmel Antilel Jisas Kraiss ko yeyupulp yipm ntitmaken yikeiwanto. Kapepe. Sank ka mintapepe, karep miniat.

**Kombio Yanimoi Bible Portions**  
**Selected Scriptures in the Yanimoi Dialect of the**  
**Kombio Language of Papua New Guinea**  
**Sampela hap Buk Baibel long tokples Kombio Yanimoi**  
**long Niugini**

copyright © 2002 Wycliffe Bible Translators, Inc.

Language: Kombio Yanimoi (Kombio)

Dialect: Yanimoi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-21

---

PDF generated using Haiola and XeLaTeX on 22 Feb 2024 from source files dated 31 Aug 2023

2126347d-d0f2-54c4-801b-f5220d9e258e